



ADDENDA DE PRORROGA DO CONVENIO DE COLABORACIÓN ENTRE A CONSELLERÍA DE ECONOMÍA, EMPREGO E INDUSTRIA E A UNIVERSIDADE DA CORUÑA PARA O FOMENTO DA INVESTIGACIÓN E A REALIZACIÓN DE PROBAS DE CONTROL DE CALIDADE DOS HIDROCARBUROS EN GALICIA

MEMORIA XUSTIFICATIVA

A directora xeral de Planificación Enerxética e Recursos Naturais da Vicepresidencia segunda e Consellería de Economía, Empresa e Innovación da Xunta de Galicia, DECLARA:

Que esta Dirección Xeral de Planificación Enerxética e Recursos Naturais formalizou coa Universidade da Coruña o instrumento convencional arriba referido por un período de vixencia que abrangue dende o 1 de xaneiro de 2021 ata o 31 de decembro de 2022.

Que o instrumento convencional ten por obxecto:

Regular a colaboración entre a Vicepresidencia segunda e Consellería de Economía, Empresa e Innovación e a Universidade da Coruña para o fomento da investigación no ámbito dos produtos petrolíferos e afíns (particularmente, combustibles e carburantes) e para a realización do control dos combustibles e carburantes á venda na Comunidade Autónoma, co fin de garantir a súa calidade, cumprindo, ao mesmo tempo, coas obrigas establecidas no Real decreto 61/2006, do 31 de xaneiro, en materia de mostraxe, análise e comunicación dos resultados en relación co control das especificacións técnicas de gasolinas, gasóleos, fuelóleos, gases licuados do petróleo e combustibles para uso marítimo.

Que existe converxencia de intereses entre as entidades asinantes en orde á consecución do obxecto referido.

Que o instrumento convencional que se asina fundaméntase no seguinte:

O Real decreto 61/2006, do 31 de xaneiro, polo que se fixan as especificacións de gasolinas, gasóleos, fuelóleos e gases licuados do petróleo, se regula o uso de determinados biocarburantes e o contido de xofre dos combustibles para uso marítimo, establece no seu artigo sétimo que as Comunidades Autónomas adoptarán as medidas necesarias para controlar, mediante mostraxes, as especificacións técnicas de gasolinas, gasóleos, combustibles para uso





marítimo e fuelóleos, comunicando á Dirección Xeral de Política Enerxética e Minas do Ministerio de Transición Ecolóxica, os resultados no caso de gasolinas, gasóleos, e fuelóleos, mentres que, en relación co contido de xofre dos combustibles para uso marítimo, a comunicación efectuarase á Dirección Xeral da Mariña Mercante do Ministerio de Transportes, Mobilidade e Axenda Urbana.

Á marxe desta obriga legal, a Vicepresidencia segunda e Consellería de Economía, Empresa e Innovación considera fundamental o control de todos os produtos petrolíferos á venda na Comunidade Autónoma co fin de garantir a súa calidade, para protexer aos consumidores e á sociedade en xeral.

A Universidade da Coruña dispón dun laboratorio de ensaio situado nas instalacións do Centro de Investigacións Tecnolóxicas en Ferrol, denominado Laboratorio de Combustibles (LABCOMB). O LABCOMB é o único laboratorio dentro da Comunidade Autónoma que conta todas as acreditacións ENAC fronte norma UNE-EN ISO/IEC 17025:2017 como recoñecemento das competencias técnicas para a realización de ensaios de produtos petrolíferos obxecto do convenio (acreditación núm. 814/LE1688), e polo tanto conta cos recursos materiais, técnicos e humanos e a experiencia necesaria para facer fronte aos traballos marcados no Decreto 61/2006.

Así mesmo, tanto a Vicepresidencia segunda e Consellería de Economía, Empresa e Innovación como a Universidade da Coruña consideran de interese común promover a cooperación para o desenvolvemento científico e tecnolóxico de Galicia e entenden que a investigación no ámbito enerxético reviste unha especial transcendencia pola súa directa vinculación co desenvolvemento da actividade económica, polo que se considera prioritaria como motor do progreso económico e social de Galicia.

A colaboración que se ven levando a cabo entre o LABCOMB e a Vicepresidencia segunda e Consellería de Economía, Empresa e Innovación ten posibilitado a formación e consolidación do grupo de investigación estable do “LABCOMB” permitindo a formación continua do seu persoal así como mellorar, continuar e ampliar as súas liñas de investigación. Así mesmo, a colaboración permite a formación de novos investigadores e de profesionais altamente cualificados en materia de ensaios de combustibles mediante a participación de xeito continuado nas tarefas de investigación e análise de estudantes de terceiro ciclo da Universidade da Coruña e mediante a realización de prácticas formativas por alumnos do ciclo medio de laboratorio. Esta actividade investigadora do LABCOMB reflíctese nunha ampla produción científica e investigadora e na realización e lectura de diversas teses doutorais.





Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados na Lei 9/2017, do 8 de novembro, de Contratos do Sector Público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

E para que conste, asínase esta memoria, en Santiago de Compostela

A Directora xeral de Planificación Enerxética e Recursos Naturais
(asinado dixitalmente)
Paula Uría Traba

